



Sarajevo, 26. juli 2016. godine

## SAOPŠTENJE ZA MEDIJE

### Ko nas to vodi u Evropsku uniju?

Zvaničnici Bosne i Hercegovine zaduženi za vođenje vanjske politike niti jednom institucionalnom informacijom, kao ni pojedinačnom izjavom, nisu se oglasili povodom donošenja najznačajnijeg dokumenta Evropske unije u oblasti vanjske politike i sigurnosti. Naime, krajem juna usvojena je nova **Globalna strategija EU iz oblasti vanjske i sigurnosne politike**, ali na zvaničnim stranicama Predsjedništva BiH, Ministarstva vanjskih poslova BiH, Direkcije za evropske integracije ili Parlamentarne skupštine BiH se ne može naći niti jedan osvrt na dokument koji je usvojilo Evropsko vijeće, kao zamjenu za Evropsku sigurnosnu strategiju koja je bila na snazi od 2003. godine. To svakako otvara pitanje na koji način se definiše i sprovodi vanjska politika Bosne i Hercegovine, odnosno kako će biti ostvareni vanjskopolitički ciljevi za koje se zalaže preko 80% građana ove zemlje.

Budući da se nijedna članica EU ne može samostalno nositi sa prijetnjama i prilikama savremenog doba, nova Strategija insistira na **zajedničkom djelovanju**. Upravo u tome se ogleda glavni cilj Globalne strategije EU čiji slogan glasi: „*Jedinstvena vizija, zajednička akcija – snažnija Evropa*“.

Značajan je i odnos Evropske unije prema regionu **Zapadnog Balkana** koji je novim dokumentom dobio na strateškoj važnosti. To se najbolje ogleda kroz politiku proširenja EU u okviru koje je kredibilan proces pristupanja, zasnovan na striktnim i fer uslovima, od vitalnog značaja za poboljšanje otpornosti država tog regiona. Zajednički izazovi EU i država Zapadnog Balkana vezani su za rješavanje pitanja u oblasti migracija, energetske sigurnosti, terorizma i organiziranog kriminala.

Usaglašavanje sa stavovima Evropske unije u oblasti vanjskog djelovanja jedna je od obaveza Bosne i Hercegovine koja proističe iz implementacije Sporazuma o stabilizaciji i pridruživanju, pa je stoga neshvatljiv ovako indolentan odnos BiH zvaničnika prema ovom pitanju. Nova strategija EU predstavlja i veoma kvalitetan vodič za ažuriranje dokumenta Sigurnosna politika BiH, koja je donešena 2006. godine i po mišljenju svih relevantnih aktera nije u skladu sa dešavanjima u sferi međunarodnih odnosa i sigurnosnim trendovima.

Dr. Denis Hadžović

Generalni sekretar

